

## ԿԱՐԾԻՔ

### **ՀՀ ոստիկանության ոլորտում հայտնաբերված կոռուպցիոն ռիսկերի և դրանց չեզոքացմանը և նվազեցմանն ուղղված գործողությունների աղյուսակի վերաբերյալ**

Ստորև ներկայացվում է Թրանսփարենսի Ինթերնեշնլ հակակոռուպցիոն կենտրոնի (ԹԻՀԿ) կարծիքը ՀՀ կոռուպցիայի դեմ պայքարի խորհրդին կից գործող անկախ փորձագիտական հանձնախմբի փորձագետի կողմից մշակված ՀՀ ոստիկանության ոլորտում հայտնաբերված կոռուպցիոն ռիսկերի և դրանց չեզոքացմանը և նվազեցմանն ուղղված գործողությունների աղյուսակի վերաբերյալ:

Ծրագիրն ավելի շատ անդրադարձել է ոլորտում առկա առանձին խնդիրների և դրանից բխող ռիսկերի, որոնք ինչ-որ չափով նվազեցվել են վերջին տարիներին՝ նկատի ունենալով Էլեկտրոնային տարբեր համակարգերի ներդրումը: Մասնավորապես, խոսքը գնում է ճանապարհային ոստիկանության, բնակչության պետական ռեգիստրի, քաղաքացիության և հատուկ կացության ռեգիստրի, անձնագրային համակարգում իրականացված մի շարք գործողությունների մասին: Զաղաքացիներին մատուցվող նշված ծառայությունների ոլորտում կատարված քայլերն, իհարկե, կարևոր են և կոռուպցիայի դեմ անհրաժեշտ պայքարի շրջանակներում շարունակում են արդիական մնալ: Սակայն ոստիկանության հակակոռուպցիոն ծրագիրը միայն նշված ոլորտներին վերաբերող միջոցառումներով սահմանափակելը և ոստիկանության գործունեության մյուս կարևոր ոլորտները ծրագրից դուրս թողնելն անընդունելի է:

Այդ առումով ծրագրում առաջարկում ենք ներառել այնպիսի համակարգային խնդիրներ, որոնք վերաբերում են օպերատիվ-հետախուզության բնագավառին, հանցագործությունների ու այլ իրավախախտումների վերաբերյալ քաղաքացիների դիմումներն ու հաղորդումները կամայականորեն ընդունելուն և դրանց ընթացք տալուն, այդ հաղորդումներին վերաբերող փաստաթղթային ծանրաբեռնվածությունն ստեղծելուն (օրինակ՝ անձը հաստատող փաստաթուղթ ներկայացնելուց հետո դրանց պատճեններ պահանջելով այն դեպքում, երբ հենց ոստիկանությունն է հանդիսանում ՀՀ-ում անձնագրեր և նույնականացման քարտեր տրամադրող մարմինը), զենք ու դրա փամփուշտներ ձեռք բերելու, պահելու, կրելու, օգտագործելու հետ կապված լիցենզիաներ/թույլտվություններ տալուն և դրանց նկատմամբ վերահսկողություն իրականացնելուն, ոստիկանության ծառայողների նկատմամբ կարգապահական պատասխանատվության ենթարկելու գործընթացի ոչ բավարար թափանցիկության, համակարգի վերաբերյալ տեղեկատվության բավարար չափով հետ կապված խնդիրներին (օրինակ, երբ որևէ իրավաչափ նպատակ չի հետապնդում ոստիկանության հաստիքացուցակի և համարված հաստիքների վերաբերյալ տեղեկատվության գաղտնիությունը), ոստիկանության կողմից իրականացվող պետական գնումների համակարգում առկա կոռուպցիոն ռիսկերին և այլն:

Ոստիկանության գործունեության այս և մի շարք այլ ոլորտներում կիրառվող հայեցողական մոտեցումների, գործունեության ոչ բավարար թափանցիկության, իրապարակայնության,

հաշվետվողականության, օրինականության հետ կապված ռիսկերն ուսումնասիրելը և դրանց չեզոքացմանն ուղղված միջոցառումներ հակակոռուպցիոն ծրագրում նախատեսելն անհրաժեշտություն է, որոնց արդյունավետ իրականացումը կարող է նպաստել ոստիկանության նկատմամբ հասարակական վստահության ամրապնդմանը: